

Inatsisartut aaliangiiffigisassaattut siunnersuut Naalakkersuisut peqquneqassasut aningaasanik immikkoortitsinissaannik persuttaanerup minnerunngitsumillu angerlarsimaffimmi persuttaanerup akiorniarnissaa ersarissumik anguniarlugu, inuiaqatigiinni 2025-mi persuttaanerit amerlassusaat ullumikkumut sanilliullugit 25 procentimik apparsimassasut. Paasisitsiniaaneq kingusinnerpaamik 1. august 2022 aallartinneqassaaq 31. december 2024-ip tungaanut ingerlanneqassalluni. (Inatsisartunut ilaasortaq Anna Wangenheim, Demokraatit)

Akissuteqaat

(Meeqqanut, Inuusuttunut Ilaqutariinnullu Naalakkersuisoq)

Aappassaaneerneqarnera

Inatsisartut aalajangiiffigisassaattut siunnersuummik matuminnga Ilaqutariinnermut Peqqissutsimullu Ataatsimiititaliap peqqissaartumik suliaqarsimaneranut Naalakkersuisut qujarusupput.

Ataatsimiititaliami amerlanerussuteqartut Naalakkersuisut allannguutissatut siunnersuutaata akuersissutigineqarnissaa inassutigigaat kiisalu ikinnerussuteqartunit marlunnik oqaaseqaateqartoqarsimasoq Naalakkersuisut maluginiarpaat.

Qanigisani, tassunga ilanngullugit inuusuttut angajoqqaallu, persuttaasarneq pillugu pitsaaliuinissaq iliuusissatut pilersaarummi qitiutinneqassaaq. Angerlarsimaffik toqqissisimanartoq persuttaanertaqanngippat kinguaariit aggersut atugarissaassapput, pitsaasumik ineriartorlutik toqqissisimasumillu peroriartorlutik. Taamaattumik inuiaqatigiinnut peqqissunut angerlarsimaffik pingaaruteqartuuvoq, iliuusissatullu pilersaarummi angerlarsimaffik immikkut ittumik qitiutinneqassaaq. Qanigisani kikkut tamarmik imminnut qanittut ilaatinneqarput, tassa imaappoq ilaqquttat, ikinngutigilluakkat ilisimasisallu.

Iliuusissatut pilersaarusiormi sapinngisamik attuumassuteqartut tamarmik ilaatinneqassapput. Innuttaasoq qitiutillugu qanimullu peqatigalugu iliuusissatut pilersaarut ineriartortinneqassaaq. Iliuusissatut pilersaarut sammisassanik arlalinnik imaqassaaq, tassunga ilanngullugu ilaatigut paasititsiniaaneq persuttaasarnermut akiuniarnermik qitiutitsisoq. Persuttaasarnerup annertuumik malunnaatilimmik annikillisinnissaa kiisalu persuttaasarnerup siunissami pitsaaliorneqarnissaa iliuusissatut pilersaarummi siunertarineqarpoq.

2023-2027-mut ukiunut tallimanut iliuusissatut pilersaarusiaq UKA 2022-mi agguaanneqarnissaanut piareersimassaaq.

Naalakkersuisut taamatut oqaaseqarlutik siunnersuutip aappassaaneerneqarnissaanut ingerlateqqippaa.